

EAST ASIAN LIBRARY
RM 8049 ROBARTS LIBRARY
UNIVERSITY OF TORONTO
TORONTO, CANADA M5S 1A5

漢魏六朝百三家集

齊

王文憲

第五十八冊

V.58

王

文

憲

集

王文憲集

王文憲集題詞

王仲寶年六歲拜受茅土未三十卽
位令僕身尚公主爵享元侯佩刀淮
水徵祥已極然早痛死父中厄天年
福造不完非人力也宋齊議禮家各
爲說吉凶叅會咸稟仲寶卽史書所

傳可謂非七志之膏腴乎齊臺佐命
褚王並推彥回風則同朝欽賞若援
論古今宣明朝典必仲寶居前彼雖
風流自命欲比安石時論未許抑觀
自古宰相議禮通達漢韋玄成匡衡
以後不多見也褚公貴而善藝徒以

別鶴琴曲銀柱琵琶稱說名士其能
則樂官伎弄耳寧望王僕射乎且二
子皆齊貴戚逢迎興運不臣跡同而
世尤惡褚者豈非以羅襪負約石頭
偷生直犬豕目之於仲寶則猶憐其
父死非命或有伍胥乞食之志而不

三才圖會
是言
二
難以國販也

婁東張溥題

王文憲集目錄

賦

靈邱竹賦

和竟陵王高松賦

表

諫壞宋明帝紫極殿以材桂起宣陽門表

請解僕射表

又

求解尚書表

議

郊殷議

二郊明堂議

日蝕不廢社祠議

南郡王昭業冠議

公府長史朝服議

又議

帝后諱議

冕旒議

皇后遷祔祭奠議

奠祭設虞議

皇太子妃服議

太子妃建銘旌議

太子迎車駕議

太子妃旒翼議

穆妃朔望設祭議

穆妃祥議

答褚淵難

答王逡問

君母服議

入學釋奠議

褚淵拜錄議

司空掾屬爲褚淵服議

司徒府史爲褚淵服議

史條例議

奏

諒闇親奉蒸嘗奏

啟

先郊後春啟

請江敦還本啟

章

拜儀同三司章

牋

與豫章王嶷牋

書

答陸澄

經義問答

曲禮問答

周易問答

孝經問答

贊

竟陵王山居贊

碑文

太宰文簡褚彥回碑文

連珠

暘連珠

哀策

高帝哀策文

皇太子妃哀策文

詩

侍皇太子釋奠宴

侍太子九日宴玄圃詩

贈徐孝嗣

春日家園

春詩

其二

春夕

後園餞從兄豫章

失題

南郊樂歌

高德宣烈樂

太廟樂歌

高德宣烈樂

穆德凱容樂

明德凱容樂

附錄

本傳

王文憲集目錄終

王文憲集卷全

齊 瑯琊王儉 著

明 太倉張溥 閱

賦

靈邱竹賦

靈邱深沉，蔓竹凝陰。神根合拱，楨榦百尋。振芳
條乎崑岳，敷六采於高岑。沿淮海而蔚映，帶沮
漳而蕭森。至東南而擅美，在淇衛而流音。方靈
壽而均茂，儀菌桂而成林。若乃青春受謝，九野

王次景集
舒榮綠蘋齊葉白芷抽萌，幹蔥蔥而特秀，篠擢
穎而垂英，霜皦鏡於原隰，木衰疏於郊阡，翠葉
與飛雪爭采，貞柯與曾冰競鮮。

和竟陵王高松賦

山有喬松，峻極青蔥，旣抽榮於岱嶽，亦擢穎於
荆峰，若乃朔窮於紀，歲亦莫止，隆冰峩峩，飛雪
千里，嗟萬有之必衰，獨貞華之無已，積皓霰而
爭光，延微飈而響起。

表

諫壞宋明帝紫極殿以材柱起宣陽門表
臣聞德者身之基、儉者德之輿、春臺將立、晉卿
秉議、北宮肇構、漢臣盡規、彼二君者、或列國常
侯、或守文中主、尚使諫諍、在義卽悅、况陛下聖
哲應期、臣等職司隆重、敢藉前誥、竊乃有心、陛
下登庸宰物、節省之教、旣昭、龍袞璇極、簡約之
訓、彌遠、乾華外構、采椽不斲、紫極故材、爲宣陽
門、臣等未譬也、夫移心疾於股肱、非良醫之美、

畏影迹而馳驚。豈靜處之方。且又三農在日。千畛咸事。輟望歲之勤。興土木之役。非所以宣昭大猷。光示遐邇。若以門居宮南。重陽所屬。年月稍久。漸就淪胥。自可隨宜修理。而合度。改作之煩。於是乎息。所啓謬合。請付外施行。

請解僕射表

臣遠尋終古。近察身事。邀恩幸藉。未見其倫。何者。子房之遇漢后。公達之逢魏君。史藉以爲美談。君子稱其高義。二臣才堪王佐。理非曲私。兩

主專仗威武。有傷寬裕。豈與庸流之人。憑含弘之澤者。同年而語哉。預在有心。胡甯無感。如使傾宗殞元。有益塵露。猶當畢志驅馳。仰訓萬一。豈容稍在形飾。以徇常事。九流任要。風猷所先。玉石朱素。由斯而定。臣亦不謂文案之間。都無微解。至於品裁臧否。特所未聞。雖存自勗。識不副意。兼竊而任。彼此俱壅。專情本官。庶幾髣髴。且前代掌選。未必俱在。代來何爲於今。非臣不可。傾心奉國。匪復退讓之典。預同休戚。甯俟位。

任爲親。陛下若不以此理賜期。豈仰望於殊眷。
頻冒嚴威。分甘尤戾。

又

待臣於常均之外。眄臣于代僚之右。親垂其章。
乘非其器。霸府方隆。超居元佐。國朝草昧。參贊
百揆。

求解尚書表

臣比年辭選。具簡天朝。欵言彰於侍接。丹誠布
於朝野。物議不以爲非。聖心未垂矜納。臣聞知

慧不如明時。求之微躬。實允斯義。妄庸之人。沉
浮無取。命偶休泰。遂踐康衢。秋葉辭條。不假風
飈之力。太陽躋景。無俟螢燭之暉。晦往明來。五
德遞運。聖不獨治。八元亮采。臣逢其時。而叨其
位。常總端右。丞管銓衡。事涉兩朝。歲綿一紀。盛
年已老。孫孺巾冠。人物徂遷。逝者將半。三考無
聞。九流寂寞。能官之詠。輟響於當時。大車之刺。
方興以來日。若夫珥貂衣袞之貴。四輔六敎之
華。誠知匪服。職務差簡。端揆雖重。猶可勉勵。至

於品藻之任。尤懼其阻。夙宵罄竭。屢試無庸。歲月之久。近世罕比。非唯悔吝在身。故乃惟塵在國。方今多士盈朝。群才競爽。選衆而授。古亦何人。冒陳微翰。必希天照。至敬無文。不敢煩黷。

議

郊殷議

南齊高帝建元元年七月有司奏郊殷之禮未詳郊在何年復以何祖祀郊殷復在何時未郊得先殷與不明堂亦應與郊同年而祭不若應祭者復有配與無配不祀者堂殿職僚毀置云何八座丞郎通關博士儀曹郎中裴昭明儀曹郎中孔暹議今年七月宜殷祠來年正月宜南郊明堂並祭而無配殿中郎司馬憲議南郊無配饗祠如舊明堂無配宜殷廢祀其殷祀同用今年十月右僕射王儉議詔可明堂可更詳有司又奏明堂尋禮無明文唯以孝經爲正竊尋設祀之意蓋爲文王有配則祭無配則止愚謂旣配上帝則以帝爲主今雖無

配不應闕祀徐邈近代碩儒每所折衷
其云郊爲天壇則堂非文廟此實明據
內外百司立議已定如更詢訪終無異
說傍儒依史竭其管見旣聖旨惟疑群
下未敢詳廢置之宜
仰由天鑒詔依舊

案禮記王制天子先祫後時祭。諸侯先時祭後
祫。春秋魯僖二年祫。明年春禘。自此以後五年
再殷。禮緯稽命徵曰。三年一祫。五年一禘。經記
所論禘祫與時祭其言詳矣。初不以先殷後郊
爲嫌。至於郊配之重。事由王迹。是故杜林議云
漢業特起。不因緣堯。宜以高帝配。魏高堂隆議

以舜配天。蔣濟云。漢時奏議。謂堯已禪舜。不得爲漢祖。舜亦已禪禹。不得爲魏之祖。今宜以武皇帝配天。晉宋因循。卽爲前式。又案禮及孝經。援神契。並云。明堂有五室。天子每月於其室聽朔布教。祭五帝之神。配以有功德之君。大戴禮記曰。明堂者。所以明諸侯尊卑也。許慎五經異義曰。布政之宮。故稱明堂。明堂盛貌也。周官匠人職。稱明堂有五室。鄭玄云。周人明堂五室。帝一室也。初不聞有文王之寢。鄭志。趙商問云。說

者謂天子廟制如明堂。是爲明堂。卽文廟耶。鄭
荅曰。明堂主祭上帝。以文王配耳。猶如郊天以
后稷配也。袁孝尼云。明堂法天之宮。本祭天帝。
而以文王配。配其父於天位。則可。牽天帝而就
人鬼。則非義也。泰元十三年。孫耆之議稱郊以
祀天。故配之以后稷。明堂以配帝。故配之以文
王。由斯言之。郊爲皇天之位。明堂卽上帝之廟。
徐邈謂配之爲言。必有神主。郊爲天壇。則堂非
文廟。史記云。趙綰王臧欲立明堂。于時亦未有

郊配。漢又祀汾陰五時。卽是五帝之祭。亦未有郊配。議者或謂南郊之日。已旅上帝。若又以無配而特祀明堂。則一日再祭。於義爲黷。案古者郊本不共日。蔡邕獨斷曰。祠南郊祀畢。次北郊。又次明堂。高廟世祖廟。謂之五供。馬融云。郊天之祀。咸以夏正五氣用事。有休有王。各以其時。兆以方郊。四時合歲。功作相成。亦以此月總旅明堂。是則南郊明堂各日之證也。近代從省。故與郊同日。猶無煩黷之疑。何者。其爲祭雖同所。

以致祭則異孔。晁云言五帝佐天化育。故有從
祀之禮。旅上帝是也。至於四郊明堂。則是本祀
之所。譬有功臣從饗。豈復廢其私廟。且明堂有
配之時。南郊亦旅上帝。此則不疑於其日。今何
故致嫌於同辰。又禮記天子祭天地四方山川
五祀歲徧。尚書堯典咸秩無文。詩云昭事上帝。
聿懷多福。據此諸義。四方山川猶必享祀。五帝
大神義不可畧。魏文帝黃初二年正月郊天地
明堂。明帝太和元年正月以武皇帝配天文皇

帝配上帝。然則黃初中南郊明堂皆無配也。又郊日及牲色異議紛然。郊特牲云郊之用辛。周之始郊也。盧植云辛之爲言自新絜也。鄭玄云用辛日者爲人當齋戒自新絜也。漢魏以來或丁或巳而用辛當多。考之典據辛日爲允。郊特牲又云郊牲幣宜以正色。繆襲據祭法云天地騂犢。周家所尚。魏以建丑爲正。牲宜尚白。白虎通云三王祭天。一用夏正。所以然者。夏正得天之數也。魏用異朔。故牲色不同。今大齊受命。建寅。

創厯郊廟用牲。一依晉宋。謂宜以今年十月殷祀宗廟。自此以後。五年再殷。來年正月上辛有事南郊。宜以其日還祭明堂。又用次辛饗祀北郊。而並無配犧牲之色。率有舊章。

二郊明堂議

四年世祖卽位。其秋有司奏尋前代嗣位。或於前郊。年或別始。晉宋以來。未有畫一。今年正月巳郊。未審明年應南北。二郊祀明堂。與不依舊通關入座丞郎博士議。尚書令王儉議。尚書領國子祭酒張緒等十七人。並同儉議。詔可。

案秦爲諸侯雜祀。諸時始皇并天下。未有定祠。

漢高受命。因雍四時而起北時。始祠五帝。未定郊丘。文帝六年。新垣平議。初起渭陽五帝廟。武帝初至雍。郊見五時。後常三歲一郊。祠雍元鼎四年。始立後土祠於汾陰。明年立太祠於甘泉。自是以後。二歲一郊。與雍更祠。成帝初卽位。丞相匡衡於長安。定南北郊。哀平之際。又復甘泉汾陰祠。平帝元始五年。王莽奏依匡衡議。還復長安南北二郊。光武建武二年。定郊祀。兆於洛陽。魏晉因循。率由漢典。雖時或參差。而類多間。

歲至於嗣位之君。參差不一。宜有定制。檢晉明
帝太甯五年南郊。其年九月崩。成帝卽位明年。
改元卽郊。簡文咸安二年南郊。其年七月崩。孝
武卽位。明年改元亦郊。宋元嘉三十年正月南
郊。其年二月崩。孝武嗣位。明年改元亦郊。此則
二代明例。差可依放。謂明年正月宜饗祀二郊。
虔祭明堂。自茲厥後。依舊間歲。

日蝕不廢社祠議

永明元年十二月有司奏。今月三日臘
祠太社。稷一日合朔日蝕。旣在致齋內。

未審干社祠無疑不曹檢未
有前准尚書令王儉議詔可

禮記曾子問天子嘗禘郊社五禮之祭簠簋既
陳唯大喪乃廢至於當祭之日火日蝕則停尋
伐鼓用牲由來尚矣而簠簋初陳問所不及據
此而言致齊初日仍值薄蝕則不應廢祭又初
平四年士孫瑞議以日蝕廢社而不廢郊朝議
從之王者父天親地郊社不殊此則前准謂不
宜廢

南郡王昭業冠議

永明五年十月有司奏南郡王昭業冠求儀注未有前准尚書令王儉議僕射王奐等十四人議並同并撰立贊冠醺酒二辭詔可

皇孫冠事。歷代所無。禮雖有嫡子嫡孫。然而地居正體。下及五世。今南郡王體自儲暉。實惟國裔。元服之典。宜異列蕃。案士冠禮。主人立冠。朝服。賓加其冠。贊者結纓。鄭立云。主人冠者之父兄也。尋其言。父及兄。則明祖在父不爲主也。大戴禮記公冠篇云。公冠自爲主。四加立冕以卿爲賓。此則繼體之君。及帝之庶子。不得稱子者。

也。小戴禮記冠義云：冠于阼，以著代也；醺于客位，三加彌尊，加有成也。注稱嫡子冠於阼，庶子冠于房。記又云：古者重冠，故行之于廟，所以自卑而尊先祖也。據此而言，彌與鄭注儀禮相會。是故中朝以來，太子冠則皇帝臨軒，司徒加冠。光祿贊冠，諸王則郎中加冠，中尉贊冠。今同于儲皇，則重依于諸王，則輕。又春秋之義，不以父命辭王父命。禮父在斯爲子，君在斯爲臣。皇太子居臣子之節，無專用之道。南郡雖處蕃國，非

支庶之列。宜稟天朝之命。微申冠胙之禮。晉武帝詔稱漢魏遣使冠諸王。非古正典。此蓋謂庶子封王。合依公冠自主之義。至於國之長孫。遣使惟允。宜使太常持節加冠。大鴻臚爲贊。醯酒之儀。亦歸二卿。祝醮之辭。附准經記。別更撰立。不依蕃國常體。國官陪位拜賀。自依舊章。其日內外二品清官以上。詣止車集賀。并詣東宮南門通牋。別日上禮。宮臣亦詣門稱賀。如上臺之儀。旣冠之後。尅日謁廟。以弘尊祖之義。此旣大

典宜通關八座丞郎并下二學詳議

公府長史朝服議

宋後廢帝元徽四年上
議爲沈侯之所駁遂寢

春秋國語云貌者情之華服者心之文巖廊盛
禮衣冠爲大是故軍國異容內外殊序而自頃
承用每有乖違府職掌人教四方是則臣居毘
佐志在當官永言先典載懷夕惕按晉令公府
長史官品第六銅印墨綬朝服進賢兩梁冠掾
屬官品第七朝服進賢一梁冠晉官表注亦與

令同。而今長史掾屬但著朱服而已。此則公違明文。積習成謬。謂宜依舊制。長史兩梁冠。掾屬一梁冠。並同備朝服。中單韋舄率由舊章。若所上蒙允。并請班司徒二府及諸儀同三府。通爲永準。又尋舊事。司徒公府領步兵者。職僚悉同降朝。不領兵者。主簿祭酒。中單韋舄並備。令史以下唯著立衣。今府旣開公。謹遵此制。其或有署臺位者。立服爲宜。按令稱謹有兼官。皆從重官之例。尋內官爲重。其署臺位者。悉宜著位之

服不在立服之例。若署諸卿寺位兼府職者。雖三品而卿寺爲卑。則宜依公府立衣之制。服章事重。禮儀所先。請臺詳服。

又議

自頃服章多闕。有違前準。近議依今文被報。不宜改革。又稱左丞劉議。按令文凡有朝服。今多闕亡。然則文存服損。非唯鉉佐。用捨旣久。卽爲舊章。如下旨。伏尋皇宋受終。每因晉舊制。律令條章。同規在昔。若事有宜。必合懲改。則當上關

詔書下由朝議縣諸日月垂則後昆豈得因外
府之乖謬以爲盛宋之興典用晉氏之律令而
謂其儀爲殯法哉順違從失非所望於高議申
明舊典何改革之可論又左丞引令史之闕服
以爲鉉佐之明比夫名位不同禮數異等令史
從省或有權宜達官簡畧爲失彌重又主簿祭
酒備服於王庭長史掾屬朱衣以就列於是倫
比自成矛盾此而可忍孰不可安將引令以遵
舊臺據失以爲例研詳符旨良所未譬當官而

行何強之有制令昭然守以無貳

帝后諱議

建元元年太常上朝
堂諱訓僕射王儉議

后諱依舊不立訓禮天子諸侯諱羣祖臣隸既有從敬之義宜爲太常府君諱。至於朝堂榜題。本施至極。旣迨尊所不及。禮降于在三。晉之京兆。宋之東安。不列榜題。孫毓議稱京兆列在正廟。臣下應諱而不上榜。宋初博士司馬道敬議東安府君諱宜上榜何承天執不同卽爲明據。

其有人名地名犯太常府君及帝后諱者名皆改。宣帝諱同二名不偏諱。所以改承明門爲北掖。以榜有之字。與承並東宮。承華門亦改爲宣華云。

冕旒議

依漢三公服山龍九章。卿華蟲七章。

皇后遷祔祭奠議

建元四年高帝山陵昭皇后應遷祔祠。
部疑有祖祭及遣啓諸奠九飯之儀。不
左僕射王
儉議從之

奠如大歛。賀循云：從墓之墓，皆設奠。如將葬，廟朝之禮。范甯云：將窆而奠，雖不稱爲祖，而不得無祭。

奠墓設虞議

有司又奏：昭皇后神主在廟，今遷祔葬。葬有虞，以安神。神旣已處廟，改葬出靈，豈應虞祭？鄭注：改葬云從廟之廟，禮宜同從墓之墓事。何容異前代？謂應無虞。左僕射王儉議從之。

范甯云：葬必有魂車，若不爲其歸，神將安舍？世中改葬，卽墓所施靈設祭，何得不祭而毀也？賀

王公集 卷八
循云既窆設奠於墓以終其事。雖非正虞亦粗相似。晉氏修復五陵。宋朝敬后改葬。皆有虞。今設虞非疑。

皇太子妃服議

建元二年皇太子妃薨前宮臣疑所服左僕射王儉議從之

禮記文王世子父在斯爲子。君在斯爲臣。且漢魏以來宮僚充備。臣隸之節。具體在三。昔庾翼妻喪。王允滕弘謂府吏宜有小君之服。況臣節之重耶。宜依禮爲舊君妻齊衰三月。居官之身

並合屬假朝晡臨哭。悉繫東宮。今臣之未從官在遠者。於居官之所屬。甯二日半。仍行喪成服。遺牋表不得赴。

太子妃建銘旌議

太子妃斬草乘黃議
建銘旌僕射王儉議

禮既塗棺。祝取銘置于殯東。大歛畢。輒應建于西階之東。

太子迎車駕議

穆妃薨。成服日。車駕出臨喪。朝議疑太子應出門迎。左僕射王儉議。

尋禮記服問君所主夫人妻太子嫡婦言國君爲此三人爲主喪也。今鑾輿臨降。自以主喪而至。雖因事撫慰。義不在吊。南郡以下。不應出門奉迎。但尊極所臨。禮有變革。權去杖經。移立戶外。足表情敬。無煩止哭。皇太子旣一宮之主。自應以車駕幸宮。依常奉候。旣當成服之日。吉凶不相干。宜以衰幘行事。望拜止哭。率繇舊章。尊駕不以臨弔。奉迎則惟常體。求之情禮。如爲可安。

太子妃旒翬議

宋大明一年太子妃薨建九旒有司又議斬草日建旒與不若建旒應幾旒及畫龍升降云何又用幾翬僕射王儉議從之

旒本是命服無關於凶事。今公卿以下平存不能備禮。故在凶乃建耳。東宮秩同上公。九命之儀。妃與儲君一體。義不容異。無緣未同常例。別立凶旒。大明舊事是不經詳議。率爾便行耳。今宜考以禮典。不得効尤從失。吉部伍自有桁輅。凶部別有銘旒。若復立旒。復置何處。翬自用八。

穆妃朔望設祭議

有司奏穆妃卒哭後靈還在道遇朔望當須設祭否王儉議時議從之

既虞卒哭。祭之於廟。本是祭序。昭穆耳。未全同。卒吉四時之祭也。所以有朔望殷事。蕃國不行。權制宋江夏王妃卒哭以後。朔望設祭。帝室既以卒哭除喪。無緣方有朔望之祭。靈筵雖未升廟堂。而舫中卽成行廟。猶如桓立及宋高祖長沙臨川二國。並有移廟之禮。豈復謂靈筵在途。便設殷事耶。推此而言。朔望不復俟祭。宋懿后

時舊事不及此益可知。

穆妃祥議

建元三年有司奏皇太子穆妃以去年七月薨其年閏九月數閏爲應以閏附正月若用月數數閏者南郡王兄弟便應以此四月晦小祥至于祥月不爲有疑不左僕射王儉議

三百六旬尚書明義。文公納幣。春秋致譏。穀梁云積分而成月。公羊云天無是月。雖然左氏謂告朔爲得禮。是故先儒咸謂三年朞喪。歲數沒閏。大功以下月數數閏。夫閏者蓋是年之餘日。

而月之異朔。所以吳商云。舍閏以正朞。允協情理。今杖朞之喪。雖以十月。而小祥至于祥。縞必須周歲。凡厭屈之禮。要取象正服。祥縞相去二月。厭降小祥。亦以則之。又且求之名義。則小祥本以年限考之。倫例則相去必應二朔。今以厭屈而先祥。不得謂此事之非期。事既同條。情無異貫。沒閏之理。固在言先。設令祥在此。晦所去縞三月。依附隹例。益復爲礙。謂應須五月。晦乃祥。此國之大典。宜共精詳。并通關八座丞郎研

盡異同

荅褚淵難

尚書令褚淵難儉議曰厭屈之典由所
尊奪情故祥縞備制而年月不申今以
十一月而祥從期可知既計以月數則
應數閏以成典若猶舍之何以異於縞
制疑者正以祥之當閏月數相縣積分
餘閏厯象所弘計月者數閏故有餘月
計年者苞舍故致盈積稱理從制有何
不可儉荅淵難隨事解釋祠部郎中王
珪之議謂喪以閏施功衰以下小祥值
閏則畧而不言今雖厭祥名猶存異於
餘服計月爲數屈追慕之心以遠爲通
日既餘分月非止朔合而全制於情唯
允僕射儉議理據詳博謹所附同今司
徒淵始雖疑難再經往反未同儉議依

議

阮

舊八座丞郎通共博議爲允以來五尺
晦小祥其祥禪自依常限奏御班下內
外詔可

含閏之議通儒所難但祥本應期屈而不遂語
事則名體俱存論哀則情無異迹雖數月義實
計年閏是年之歸餘故宜總而苞之期而兩祥
緣尊故屈祥則沒閏象年所申屈申兼著二途
具舉經紀之旨其在茲乎如使五月小祥六月
乃閏則祥之去縞事成二月是爲十一月以象
前期二朔以放後歲名有區域不得相參魯襄

二十八年十二月乙未楚子卒。唯書上月初不言閏。此又附上之明義也。鄭射王賀。唯云期則沒閏。初不復區別杖期之中祥。將謂不俟言矣。成休甫云。大祥後禫有閏。別數之。明杖期之祥。不得方於綬縞之末。卽恩如彼。就例如此。

荅王遂問

皇太子穆妃服尚書左丞兼著作郎王遂問。左僕射王儉中軍南郡王。小祥應待聞喜。不穆妃七月二十四日薨。聞喜公八月發哀。計十一月之限。應在六月。南郡王爲當同取六月。則大祥復申一月。應用八月。非復正月。在存親之義。若

各自爲祥廬聖相間立素相標未審當
有此疑不司徒褚淵等二十人並同儉
議爲允請以
爲永制詔可

送往有已復生有節罔極非服制所申祥縞明
示終之斷相待之義經記無聞世人多以廬室
衰麻不宜有異故相去一二月者或申以俱除
此所謂任性徑行未達禮旨昔撰喪記已嘗言
之遠還之人自有爲而未祭在家之子立何辭
以不變禮有除喪而歸者此則經記之遺文不
待之明據假使應待則相去彌年亦宜必待乃

爲衰經永服以窮生吉蠲長絕于宗廟斯不可
矣。苟曰非宜。則旬月之間。亦不容申。何者。禮有
倫序。義無徒設。今遠則不待。近不相須。禮例旣
乖。卽心無取。若疑兄弟同居吉凶舛雜。則古有
異宮之義。設無異宮。則遠還之子。自應開立別
門。以終喪事。靈筵祭奠。同在家之人。再替而毀。
所以然者。奔喪禮云。爲位不奠。鄭立云。以其精
神不存乎此也。聞哀不時。實緣在遠。爲位不奠。
益有可安。此自有爲而然。不關嫡庶。庶子在家。

亦不待嫡矣。而況儲妃正體王室。中軍長嫡之重。天朝又行權制。進退彌復非疑。謂不應相待。中軍祥縞之日。聞喜致哀而已。不受弔慰。及至忌辰變除。昆弟亦宜相就寫情。而不對客此國之大典。宜通關八座丞郎共盡同議。然後奏御。

君母服議

建元三年太子穆妃薨南郡王聞喜公國臣疑制君母服儉又議

禮庶人爲國君齊衰先儒云庶人在官若府史之屬是也。又諸侯之大夫妻爲夫人服總衰七

月。以此輕微疎遠。故不得盡禮。今皇孫自是蕃國之王公。太子穆妃是天朝之嫡婦。宮臣得申小君之禮。國官豈敢爲夫人之敬。當單衣白帟。素帶哭於中門外。每臨輒入。與宮官同。

入學釋奠議

齊武帝永明三年春。詔立學。創立堂宇。召公卿子弟。下及員外郎之胥。凡置生二百人。其年秋中。悉集有司。奏宋元嘉舊事。學生到先釋奠。先聖先師禮。又有釋菜。未詳今當行何禮。用何樂及禮器。尚書令王儉上議。其冬。皇太子講孝經。親臨釋奠。車駕幸聽。

周禮春入學舍菜合舞記云始教皮弁祭菜示敬道也。又云始入學必祭先聖先師。中朝以來釋菜禮廢。今之所行。釋奠而已。金石俎豆皆無明文。方之七廟則輕。比之五禮則重。陸納車胤謂宣尼廟宜依亭侯之爵。范甯欲依周公之廟。用王者儀。范宣謂當其爲師則不臣之。釋奠日備帝王禮樂。此則車陸失於過輕。二范傷於太重。喻希云若至王者自設禮樂則肆賞於至敬之所。若欲嘉美先師則所況非備。尋其此說守

附情理皇朝屈尊弘教待以師資引同上公卽
事惟允。元嘉立學裴松之議應舞六佾以郊樂
未具。故權奏登歌。今金石已備宜設軒縣之樂
六佾之舞。牲牢器用悉依上公。

褚淵拜錄議

高帝崩遺詔以淵爲錄尚書事江左以
來無單拜錄者有司疑立優策尚書令
王儉議
從之

見居本官別拜錄。應有策書而舊事不載。中朝
以來三公王侯則優策並設。官品第二策而不

優。優者褒美。策者兼明。尚書職居天官。委寄政
化之本。故尚書令品雖第三。拜必有策錄。尚書
品秩不見。而總任彌重。前代多與本官同拜。故
不別有策。卽事緣情。不容均之。凡僚宜有策書。
用申隆寄。旣異王侯。不假優文。

司空掾屬爲褚淵服議

淵。改授司空薨。掾屬以淵未
拜。疑應爲吏敬。不王儉議。

依禮。婦在塗。聞夫家喪。改服而入。今掾屬雖未
服。勤而吏節。稟於天朝。宜申禮敬。

司徒府史爲褚淵服議

司徒府史又以淵旣解職而未恭
後授府猶應上服以不儉又議

依中朝士孫德祖從樂陵遷爲陳留未入境樂陵郡吏依見君之服陳留迎吏依娶女有吉日衰齊弔司徒府宜依官制服。

史條例議

建元二年初置史官檀超與驃騎記室江淹掌史職上表立條例開元紀號不取宋年封爵各詳本傳無假年表立十志律歷禮樂天文五行郊祀刑法藝文依班固朝會輿服依蔡邕司馬彪州郡依徐爰百官依范曄合州郡班固五星

載天文日蝕載五行改日蝕入天文志
以建元爲始帝女體自皇宗立傳以備
甥舅之重又立處士列女傳詔內外詳
議左僕射王儉議詔日月災隸天文餘
如儉議

金粟之重八政所先。食貨通則國富民實。宜加
編錄。以崇務本。朝會志前史不書。蔡邕稱先師
胡廣說漢舊儀。此乃伯喈一家之曲碎小儀。無
煩錄。宜立食貨省朝會。洪範九疇。一曰五行。五
行之本。先乎水火之精。是爲日月五行之宗也。
今宜憲章前軌。無所改革。又立帝女傳。亦非淺

識所安。若有高德異行。自當載在列女。若止於
常美。則仍舊不書。

王文憲集

卷全

三十五

奏

諒闇親奉蒸嘗奏

南齊高帝建元四年尚書令王儉採晉中朝諒闇議奏從之

權典旣行。喪禮斯奪。事興漢世。而源由甚遠。殷宗諒闇。非有服之稱。周王卽吉。唯宴樂爲譏。春秋之義。嗣君踰年卽位。則預朝會聘享焉。左氏云。凡君卽位。卿出並聘。踐修舊好。又云。諸侯卽位。小國聘焉。以繼好結信。謀事補闕。禮之太者。至於諒闇之內。而圖婚三年未終。而吉。禘齊歸。

之喪不廢蒐杞公之卒不徹樂皆致譏貶以明
鑒戒自景而談朝聘蒸嘗之典卒哭而備行婚
禘蒐樂之事三載而後舉通塞興廢各有自然
又案大戴禮記及孔子家語並稱武王崩成王
嗣位明年六月旣葬周公冠成王而朝于祖以
見諸侯命祝雍作頌襄十五年十一月晉侯周
卒十六年正月葬晉悼公平公旣卽位改服修
官烝于曲沃禮記魯子問孔子曰天子崩國君
薨則取群廟之主而藏諸祖廟禮乎卒哭成事

而後主各反其廟。春秋左氏傳凡君卒哭而祔，祔而後特祀於主。蒸嘗禘於廟，先儒云特祀於主者，特以喪禮奉新亡者。至於寢則不同於古。蒸嘗禘於廟者，卒哭成事，羣廟之主各返其廟，則四時之祭皆卽吉也。三年喪畢，吉禘於廟，躋群主以定新主也。凡此諸議，悉著在經誥。昭乎方冊，所以晉宋因循同規前典。卒哭公除，親奉蒸嘗，率禮無違。因心允協。爰至泰豫元年，禮官立議，不宜親奉，乃引三年之制，自天子達，又據

王制稱喪三年不祭。唯祭天地社稷。越紼而行。事。曾不知自天子達。本在至情。旣葬釋除。事以權奪。委哀襲衾。孝享宜申。越紼之旨。事施未葬。卒哭之後。何紼可越。復依范宣之難杜預。譙周之論士祭。竝非明據。晉武在喪。每欲存甯戚之懷。不全依諒闇之典。至於四時蒸嘗。蓋以哀疾未堪。非便頓改舊式。江左以來。通儒碩學。所厯多矣。守而弗革。義豈徒然。又宜卽心而言。公卿大夫。則負宸親臨。三元告始。則朝會萬國。雖金

石輟響而簋簠充庭情深於恒哀而跡降於凡
制○豈○曰○能○安○國○家○故○也○宗○廟○蒸○嘗○孝○敬○所○先○甯
容吉事備行。斯典獨廢。就令必宜廢祭。則應三
年永闕。乃復同之他故。有司攝禮。進退二年。彌
垂典衷。謂宜依舊親奉。

王文憲集

卷八

王

文

憲

啓

先郊後春啓

南齊武帝永明元年當南郊而立春在郊後世祖欲遷郊尚書令王儉啓從之

案禮記郊特牲云郊之祭也迎長日之至也大報天而主日也易說三王之郊一用夏正盧植云夏正在冬至後傳曰啓蟄而郊此之謂也然則圜丘與郊各自行不相害也鄭玄云建寅之月晝夜分而日長矣王肅曰周以冬祭天於圜丘以正月又祭天以祈穀祭法稱燔柴太壇則

園丘也。春秋傳曰啓蟄而郊。則祈穀也。謹尋禮傳。二文各有其義。盧王兩說。有若合符。中朝省二丘。以并二郊。卽今之郊禮義。在報天事兼祈穀。旣不全以祈農。何必俟夫啓蟄。史官唯見傳義。未達禮旨。又尋景平元年正月二日辛丑南郊。其月十一日立春。元嘉十六年正月六日辛未南郊。其月八日立春。此復是近世明例。不以先郊後春爲嫌。若或以元日合朔爲礙者。則晉成帝咸康元年正月一日加元服。二日親祠南

郊元服之重百僚備列雖在致齋行之不疑今
齋內合朔此卽前准若聖心過恭甯在嚴潔合
朔之日散官備防非預齋之限者於止車門外
別立幔省。若日色有異則立於省前望實爲允
謂無煩遷日。

請江敦還本啓

初宋明帝敕敦出繼從叔孫爲從祖淳
後于是僕射王儉啓尚書參議謂問世
立後禮無其文荀顗無子立孫墜禮之
始何期又立此論義無所據于是敦還
本家

禮無後小宗之文。近世緣情。皆繇父祖之命。未有旣孤之後。出繼宗族也。雖復臣子一揆。而義非天屬。江忠簡所寄。唯敦一人。傍無眷屬。敦宜還本。若不欲江慈絕後。可以敦小兒繼慈爲孫。

章

拜儀同三司章

臣聞日中則昃、盈虛之定分、器滿必傾、往事之
恒理、遂乃班同衮章、燮和台曜、外叅論道、內總
百司、物議惟塵、自識非據、

王文憲集

卷全

牋

與豫章王嶷牋

舊楚蕭條。仍歲多故。荒民散亡。南史作政寔須

緝理。公臨蒞甫爾。英風惟穆。江漢來蘇。入荒慕

義。入荒一作入州自庾亮以來。荆州一作楚無復此美。南史

無美字政。古人云。期月有成。而公旬日成化。一作致治

豈不休哉。

五十六

古人云：『君子之德，風也。小人之德，草也。』

夫德者，政之基也。政者，德之華也。德之不修，政將何立？

故君子必先慎乎德。德有餘，則小人自服；德不足，則小人自叛。

是以君子之德，無所不周。德教之於民，猶水之於木也。

與衆共之，則衆歸之。

書

荅陸澄

易體微遠。實貫群籍。施孟異聞。周韓殊旨。豈可專據小王。便爲該備。

一作輔

依舊存鄭。高同來說。

元凱注傳。超邁前儒。若不列學官。其可廢矣。賈氏注經。世所罕習。穀梁小書。無俟兩注。存糜畧范。率由舊式。凡此諸義。並同雅論。疑孝經非鄭所注。僕以此書明百行之首。實人倫所先。七畧藝文。並陳之六藝。不與蒼頡凡將之流也。鄭注

虛實。前代不嫌。意謂可安。仍舊立置。

經義問答

曲禮問答

永明五年冬太子臨國學親臨策試諸生於坐
問少傅王儉曰曲禮云無不敬尋下之奉上可
以盡禮上之接下慈而非敬今總同敬名將不
爲昧儉曰鄭立云禮主于敬便當是尊卑所同
太子曰若如來通則忠惠可以一名孝慈不須
別稱儉曰尊卑號稱不可悉同愛敬之名有時
相次忠惠之異誠以聖旨孝慈互舉竊有徵據

禮云不勝喪比於不慈不孝。此則其義。太子曰
資敬奉君。資愛事親。兼此二塗。唯在一極。今乃
移敬接下。豈復在三之義。儉曰。資敬奉君。必同
至極。移敬逮下。不慢而已。太子曰。敬名雖同。深
淺既異。而文無差別。彌復增疑。儉曰。繁文不可
備設。畧言深淺已見。傳云。不忘恭敬。民之主也。
書云。奉先思孝。接下思恭。此又經典明文互相
起發。

周易問答

太子問王儉曰周易乾卦本施天位而說卦云
帝出乎震震本非天義豈相當儉曰乾健震動
天以運動爲德故言帝出震太子曰天以運動
爲德君自體天居位震雷爲象豈體天所出儉
曰主器者莫若長子故受之以震萬物出乎震
故亦帝所與焉。

孝經問答

儉又諮太子曰孝經仲尼居曾子侍夫孝理弘
深大賢方盡其致何故不授顏子而寄曾生太

子曰。曾生雖德慙體二。而色養盡禮。去物尚近。接引非隔。弘宣規教。義在于此。儉曰。接引非隔。弘宣雖易去聖轉遠。其事彌輕。旣云人能弘道。將恐人輕道廢。太子曰。理旣有在。不容以人廢言。而况中賢之才。弘上聖之教。甯有壅塞之嫌。

贊

竟陵王山居贊

升堂踐室，金暉玉朗，亶亶大韶，遙遙閑賞。道以德弘，聲由業廣，義重實歸，情深虛往。濠梁在茲，安事遐想。

碑文

太宰文簡褚彥回碑文

夫太上有立德，其次有立功，此之謂不朽。所以
子產云：亡宣尼泣其遺愛。隨武旣沒，趙文懷其
餘風。於文簡公見之矣。公諱淵，字彥回，河南陽
翟人也。微子以至仁開基，宋段以功高命氏。爰
逮兩漢，儒雅繼及。魏晉以降，奕世重暉。乃祖太
傅元穆，公德合當時，行比州壤，深識臧否，不以
毀譽形言。亮采王室，每懷沖虛之道，可謂婉而

成章志而

晦者矣，自茲厥後，無替前規，建官

惟賢，軒冕相襲，公稟川嶽之靈暉，含珪璋而挺曜，和順內凝，英華外發，神茂初學，業隆弱冠，是以仁經義緯，敦穆千閨，庭金聲玉振，寥亮于區宇，孝敬淳深，率由斯至，盡歡朝夕，人無間言，逍遙乎文雅之囿，翱翔乎禮樂之場，風儀與秋月齊明，音徽與春雲等潤，韻宇弘深，喜愠莫見其際，心明通亮，用人必就於已，汪汪焉洋洋焉，可謂澄之不清，撓之不濁，袁陽源才氣高奇，綜覈

精裁宋文帝端明臨朝鑒賞無昧袁旣延譽於
遐邇。文亦定婚於皇家。選尚餘姚公主。拜駙馬
都尉。漢結叔高。晉姻武子。方斯蔑如也。釋褐著
作佐郎。轉太子舍人。濯纓登朝。冠冕當世。升降
兩宮。實惟時寶。具瞻之範旣著。台衡之望斯集。
出參太宰軍事。入爲太子洗馬。俄遷秘書丞。贊
道槐庭。司文天閣。光昭諸侯。風流籍甚。以父憂
去職。喪過乎哀。幾將毀滅。有識留感。行路傷情。
服闋。除中書侍郎。王言如絲。其出如綸。恪居官

次智效惟穆于時新安王寵冠列蕃越敷拜教
毘佐之選妙盡國華出爲司徒右長史轉尚書
吏部郎執銓以平御煩以簡裴楷清通王戎簡
要復存於茲太始之初入爲侍中曾不移朔遷
吏部尚書是時天步初夷王途向阻元戎啓行
衣冠未緝內贊謀謨外康流品制勝旣遠涇渭
斯明賞不失勞舉無失德績簡帝心聲敷物聽
事甯領太子右衛率固讓不拜尋領驍騎將軍
以帷幄之功膺庸祗之秩封雩都縣開國伯食

邑五百戶、旣秉辭梁之介、又懷寢邱之志、所受
田邑、不盈百井、久之重爲侍中、領右衛將軍、盡
規獻替、均山甫之庸、緝熙王旅、兼方叔之望、丹
陽京輔、遠近攸則、吳興襟帶、實惟股肱、頻作二
守、並加蟬冕、政以禮成、民是以息、明皇不豫、儲
后幼沖、貽厥之寄、允屬時望、徵爲吏部尚書、領
衛尉、固讓不拜、改授尚書右僕射、端流平衡、外
寬內直、弘二八之高謨、宣由庚而垂詠、太宗卽
世、遺命以公爲散騎常侍、中書令、護軍將軍、遂

往事居忠貞允亮秉國之均四方是維百官象
物而動軍政不戒而備公之登泰階而尹天下
君子以爲美談亦猶孟軻致欣於樂正羊職悅
賞於士伯者也丁所生母憂謝職毀疾之重因
心則至朝議以有爲爲之魯侯垂式存公忘私
方進明準爰降詔書敦還攝任固請移歲表奏
相望事不我與屈已弘化屬值三季在辰戚藩
內侮桂陽失圖窺窬神器鼓棹則滄波振蕩建
旗則日月蔽虧出江派而風翔入京師而雷動

鳴控弦於宗稷。流鋒鏃於象魏。雖英宰臨戎。元
渠時殄。而餘黨實繁。宮廟憂逼。公乃摠熊羆之
士。率不貳心之臣。戮力盡規。克甯禍亂。康國祚
於綴旒。拯王維於已墜。誠由太祖之威風。抑亦
仁公之翼佐。可謂德刑詳禮。義信戰之器也。以
靜難之功。進爵爲侯。兼授尚書令。中軍將軍。給
班劍二十人。功成弗有。固秉撝挹。改授侍中。中
書監。護軍如故。又以居母艱。去官。雖事緣義感。
而情均天屬。顏丁之合禮。二連之善喪。亦曷以

踰天厭宋德、水運告謝、嗣主荒怠於天位、強臣
憑陵於荆楚、廢昏繼統之功、戡亂甯民之德、公
實仰贊宏規、參聞神筭、雖無受脤出車之庸、亦
有甘寢秉羽之績。乃作司空、山川攸序、兼授將
軍、戎政輯睦、旣而齊德龍興、順皇高禪、深達先
天之運、匡贊奉時之業、弼諧永正、徽猷弘遠、樹
之風聲、著之話言、亦猶稷契之臣、虞夏、荀裴之
奉、魏晉、自非坦懷至公、永監崇替、孰能光輔五
君、寅亮二代者哉、大啟南康、爰登中鉉、時膺土

宇固辭拜教。今之尚書令古之冢宰。雖秩輕於
袞司。而任隆於百辟。蹇遂冲旨。改授朝端。邇無
異言。遠無異望。帝嘉茂庸。重申前冊。執五禮以
正民。簡八刑而罕用。故能聘績康衢。延慈哲后。
義在資敬。情同布衣。出陪鑾躅。入奉帷殿。仰南
風之高詠。餐東杼一作野之秘寶。雅議於聽政之
震。披文於宴私之夕。參以酒德。間以琴心。暖有
餘暉。遙然留想。君垂冬日之溫。臣盡秋霜之戒。
肅肅焉。穆穆焉。於是見君親之同致。知在三之

如一、太祖升遐、綢繆遺寄、以侍中司徒錄尚書事、稟玉几之顧、奉綴衣之禮、擇皇齊之令典、致聲化于雍熙、內平外成、實昭舊職、增給班劔三十人、物有其容、徽章斯允、位尊而禮卑、居高而思降、自夏徂秋、以疾陳退、朝廷重違謙光之旨、用申超世之尚、改授司空領驃騎大將軍侍中錄尚書如故、景命不永、大漸彌留、建元四年八月二十一日薨于私第、春秋四十有八、昔柳莊疾棘、衛君當祭而輟禮、晏嬰既往、齊君趨車而

行哭公之云亡、聖朝震悼於上、群后恇慟于下、豈非哀纏一國、痛深一主而已哉、追贈太宰侍中錄尚書如故、給節羽葆鼓吹班劍爲六十人、謚曰文簡、禮也、夫成德而處、萬物不能害其貞、虛已以游、當世不能擾其度、均貴賤於條風、忘榮辱於彼我、然後可兼善天下、聊以卒歲、經始圖終、式免祗悔、誰云克備、公實有焉、是以義結君子、惠霑庶類、言象所未形、述詠所不盡、故吏某甲等感逝川之無捨、哀清暉之眇默、餐輿誦

於丘里、瞻雅詠於京國、思衛鼎之垂文、想晉鍾
之遺則、方高山而仰止、刊立石以表德、其辭曰、
辰精感運、昴靈發祥、元首惟明、肱股惟良、天鑑
璿曜、踵武前王、欽若元輔、體微知章、永言必孝、
因心則友、仁洽兼濟、愛深善誘、觀海齊量、登嶽
均厚、五臣茲六、八元斯九、內謨帷幄、外曜台階、
遠無不肅、邇無不懷、如風之偃、如樂之諧、光我
帝典、緝彼民黎、率禮蹈謙、諒實身幹、跡屈朱軻
志隆衡館、眇眇立宗、萋萋辭翰、義旣川流、文亦

霧散嵩構雲頽梁陰載缺德猷靡嗣儀形長遞
怵悵餘徽鏘洋遺烈久而彌新用而不竭

此乃一物也

此乃一物也

一

連珠

暘連珠

蓋聞王佐之才雖遠，豈必見採於當世，凌雲之
氣徒盛，無以自致于雲間。是故魏人指玉於外
野，和氏泣血于荆山。

經曰：血氣不和，百病乃生。

經曰：血氣不和，百病乃生。血氣不和，百病乃生。

經曰：血氣不和，百病乃生。血氣不和，百病乃生。

經曰：血氣不和，百病乃生。

經曰：血氣不和，百病乃生。

哀策

高帝哀策文

并序

降階執禮，泣血纏心。感客臺之罷御，哀恭館之不臨。仰神儀而邈絕，視區物而增陰。俾茲良敬，修舊則，敢圖鴻規，式揚至德。其辭曰：

靈源遙裔，肇惟商邱。聖功甯夏，賢識歸周。我皇踵武，超冠前猷。美風允迪，德音孔修。月准敷仁，日精表孝。則地均和，體天合炤。外弘三至，內隆七教。水祀將傾，乾維晦象。韋弁長襲，鼓磬屬響。

聲化已淪，政刑遂往。國圖靡緝，民規載爽。康世
以德，撥亂資武。威以雷霆，潤以風雨。六術允昭，
四義克舉。自東徂北，遐方卽叙。功被河濟，化隆
江漢。帝謨仰式，王維佇幹。改步藩屏，來登翼贊。
綢繆總章，因循陽館。昔在保衡，君違斯政。爰茲
博陸，亦鑒靈命。效昏以忠，登明資敬。義煥金石，
功昭舞詠。蠢爾荆漢，悖亂人經。謀連樞禁，兵接
神垌。禦姦以惠，禦宄以刑。猷捷宗寢，飲至王庭。
政教雲行，徽猷天造。山鑑紫璇，苑茂朱草。玉檢

騰暉金繩薦寶天鏡既穆地維既肅遐邇壹體
表裏禔福乃眷斯民昧旦抒軸興文偃武續禹
舊服所向惟簡所保惟賢居尊彌約無善不延
膠章載緝風軌克宣上洞清儀下達玄泉聽覽
閑日應物餘景怡憲以文棲心以靜鴻章晨映
徽言夕永迹庇區服情深箕穎萬寓殮和百神
受職梁甫欣儀雲亭望式輔德伊何奄捐民極
嵩岳長傾宸暉斯旻機炤惟寂達鑒靡傷慎終
敬始知微知彰立言垂範玉潤金相瞻仰遺式

哀結流霜，旋玉軼之噉鏡，動雲旗之逶迤，振哀
笳于八極，響清蹕于咸池，顧應掖而稍遠，視機
衡而長離，風遲遲而懷暮，日惜惜其若垂，感衣
冠于喬岳，追弓劍之在斯，悼丁年之薄祐，訴窮
心于兩儀。

皇太子妃哀策文

肇惟初職，芳猷夙就，翩翩禮園，徘徊樂園，視秋
齊明，方春等茂，伊宋之季，天衢薦阻，咨我儲貳，
締縉江澣，衛女事齊，樊姬贊楚，美著嬪嗣，徽音

踵武數盈則反否極斯昌肅膺靈命經緯三光
往儀衡館來式椒堂訓組咸事象服有章八演
仰則六幽望景悠悠草昧如何不永方中委曜
先秋落穎世有遺塵庭無餘影嗚呼哀哉遵三
兆之嘉日迨九筮之靈期澄金波而映鑾旆命
飛廉而拂瓊輜揚清笳于漢表動嘶挽于雲基

詩

侍皇太子繹奠宴

禮惟國幹，義實民端。身由業澡，世以教安。金鎔
乃器，水術伊瀾。漸芳則馥，履冰固寒。瞽宗務時，
頴宮善誘。咨此含生，躋彼仁壽。淳移雅闕，厯茲
永久。遊藝莫師，獨學惟友。三兆戒辰，八鸞警旦。
風動蒿宮，雲棲參館。禮邁仁周，樂超英茂。神保
爰格，祝史斯贊。鬱鬯旣終，德馨是與。降冕上庠，
升宴東序。槐宰金貞，藩維玉譽。時彥莘莘，國胄

三才集
卷八
楚楚

侍太子九日宴玄圃詩

明明儲后，冲默其量。徘徊禮樂，優游風尚。微言
外融，幾神內王。就日齊暉，儀雲等望。本茂條榮，
源澄流絜。漢稱間平，周云魯衛。咨我藩華，方軼
前軌。秋日在房，鴻雁來翔。寥寥清景，靄靄微霜。
草木搖落，幽蘭獨芳。眷言淄苑，尚想濠梁。旣暢
旨酒，亦飽徽猷。有來斯悅，無遠不柔。

贈徐孝嗣

婉婉遊龍，載遊載東。靡靡行雲，並躍齊蹤。無類不感，有來斯雍。之子云邁，嗟我莫從。歲云暮止，述職戒行。崇蘭罷秀，孤松獨貞。悲風宵遠，乘雁晨征。撫物遐想，念別書情。

春日家園

徙倚未云暮，陽光忽已收。羲和無停晷，壯士豈淹留。冉冉一作荏苒老將至，功名竟不修。稷契匡虞夏，伊呂翼商周。撫躬謝先哲，解紱歸山丘。

春詩二首

蘭生已匝苑，萍開欲半池。
輕風搖雜蘼，細雨亂叢枝。

其二

風光承露照，霧色點蘭暉。
青莢結翠藻，黃鳥弄春飛。

春夕

露華方照歲，雲彩復經春。
虛閨稍疊草，幽帳日凝塵。

後園餞從兄豫章

茲夕竟何夕，念別開層軒。光風轉蘭蕙，流月泛
虛園。

失題

方軌并茂，追清彥輔。柔亦不茹，剛亦不吐。

南郊樂歌

高德宣烈樂

饗帝嚴親，則天光大。舄奕前古，榮鏡無外。日月
宣華，卿雲流靄。五漢同休，六幽成泰。

太廟樂歌

高德宣烈樂

悠悠草昧，穆穆經綸。乃文乃武，乃聖乃神。動龕
危亂，靜比斯民。誕應休命，奄有八賁。握機肇運，
光啓禹服。義滿天淵，禮昭地軸。澤靡不懷，威無
不肅。戎夷竭歡，象來致福。偃風裁化，暉日敷祥。
信星含曜，秬草流芳。七廟觀德，六樂宣章。惟先
惟敬，是享是將。

穆德凱容樂

太姒嬪周，塗山儷禹。我后嗣徽，重規疊矩。肅肅

闕宮翔翔雲舞，有享德馨，無絕終古。

明德凱容樂

多難固業，殷憂啓聖，帝宗纘武，維時執競，起柳
獻祥百堵，興詠義雖祀夏，功符受命，遠無不懷，
邇無不肅，其儀濟濟，其容穆穆，赫矣君臨，昭哉
嗣服，允王惟后，膺此多福，禮以昭事，樂以感靈，
八簋陳室，六舞充庭，觀德在廟，象德是形，四海
來祭，萬國咸甯。

王公集卷八
五

本傳

王儉字仲寶琅瑯臨沂人也祖曇首宋右光祿
父僧綽金紫光祿大夫儉生而僧綽遇害爲叔
父僧虔所養數歲襲爵豫章侯拜受茅土流涕
嗚咽幼有神彩專心篤學手不釋卷丹陽尹袁
粲聞其名言之於明帝尚陽羨公主拜駙馬都
尉帝以儉嫡母武康公主同太初巫蠱事不可
以爲婦姑欲開塚離葬儉因人自陳密以死請
故事不行解褐祕書郎太子舍人超遷祕書丞

上表求校墳藉，依七畧撰七志四十卷。上表獻之。表辭甚典，又撰定元徽四部書目。母憂服闋，爲司徒右長史。晉令公府長史著朝服，宋大明以來著朱衣，儉上言宜復舊。時議不許。蒼梧暴虐，儉憂懼，告袁粲求出，引晉新安王婿王獻之爲吳興例，補義興太守，還爲黃門郎，轉吏部郎。昇明二年，遷長兼侍中，以父終此職，固讓。儉察太祖雄異，先於領府衣裾。太祖爲太尉，引爲右長史，恩禮隆密，專見任用，轉左長史及太傅之

授儉所唱也。少有宰相之志。物議咸相推許。時大典將行。儉爲佐命。禮儀詔策皆出於儉。褚淵唯爲禪詔文。使儉參治之。齊臺建。遷右僕射。領吏部。時年二十八。太祖從容謂儉曰。我今日以青溪爲鴻溝。對曰。天應人順。庶無楚漢之事。建元元年。改封南昌縣公。食邑二千戶。明年轉左僕射。領選如故。上壞宋明帝紫極殿。以材柱起宣陽門。儉與褚淵及叔父僧虔連名上表諫。上手詔酬納。宋世外六門設竹籬。是年初有發白。

虎樽者言白門三重門竹籬穿不完上感其言
改立都牆儉又諫上答曰吾欲令後世無以加
也朝廷初基制度草創儉識舊事問無不答上
歎曰詩云維嶽降神生甫及申今亦天爲我生
儉也其年儉固請解見許加侍中固讓復散騎
常侍上曲宴羣臣數人各使効伎藝褚淵彈琵琶
王僧虔柳世隆彈琴沈文季歌子夜來張敬
兒舞王敬則拍張儉曰臣無所解唯知誦書因
跪上前誦相如封禪書上笑曰此盛德之事吾

何以堪之後上使陸澄誦孝經自仲尼居而起
儉曰澄所謂博而寡要臣請誦之乃誦君子之
事上章上曰善張子布更覺非奇也尋以本官
領太子詹事加兵三百人上崩遺詔以儉爲侍
中尚書左鎮軍將軍世祖卽位給班劔二十人
永明元年進號衛軍將軍參掌選事二年領國
子祭酒丹陽尹本官如故給鼓吹一部三年領
國子祭酒叔父僧虔亡儉表解職不許又領太
子少傅本州中正解丹陽尹舊太子敬二傅同

至是朝議接少傅以賓友之禮。是歲省摠明觀於儉宅。開學士館。悉以四部書充儉家。又詔儉以家爲府。四年以本官領吏部。儉長禮學。諳究朝儀。每博議證引先儒。罕有其例。八坐丞郎無能異者。令史諮事。賓客滿席。儉應接銓序。傍無留滯。十日一還學。監試諸生。巾卷在庭。劔衛令史儀容甚盛。作解散髻。斜插幘簪。朝野慕之。相與放效。儉常謂人曰。江左風流宰相。唯有謝安。蓋自比也。世祖深委仗之。士流選用。奏無不可。

五年卽本號開府儀同三司固讓六年重申前命先是詔儉三日一還朝尚書令史出外諮事上以往來煩數復詔儉還尚書下省月聽十日出外儉啓求解選不許七年乃上表見詒改領中書監參掌選事其年疾上親臨視薨年三十八吏部尚書王晏啓及儉喪上答曰儉年德富盛志用方隆豈意暴疾不展救護便爲異世奄忽如此痛酷彌深其契闊艱運義重常懷言尋悲切不能自勝痛矣奈何往矣奈何詔衛軍文

武及臺所兵仗可悉停待葬又詔曰慎終追遠
列代通規褒德紀勲彌峻恒策故侍中中書令
太子少傅領國子祭酒衛軍將軍開府儀同三
司南昌公儉體道秉哲風宇淵曠肇自弱齡清
猷自遠登朝應務民望斯屬草昧皇基協隆鼎
祚宏謨盛烈載銘彝篆及贊朕躬徽績光茂忠
圖令範造次必彰四門允穆百揆時序宗臣之
重情寄兼常方正位論道永釐袞職弼茲景化
以贊隆平天不愁遺奄焉薨逝朕用震慟于厥

心可追贈太尉侍中中書監公如故給節加羽
葆鼓吹增班劔爲六十人葬禮依故太宰文簡
公褚淵故事冢墓材官營辦謚文憲公儉寡嗜
慾唯以經國爲務車服塵素家無遺財手筆典
裁爲當時所重少撰古今喪服集記并文集並
行於世今上受禪下詔爲儉立碑降爵爲侯千
戶儉弟遜昇明中爲丹陽丞告劉秉事不蒙封
賞建元初爲晉陵太守有怨言儉慮爲禍因褚
淵啓聞中丞陸澄依事舉奏詔曰儉門世載德

竭誠佐命特降刑書宥遜以遠徙永嘉郡道伏誅

史臣曰褚淵袁粲俱受宋明帝顧託粲旣死節於宋氏而淵逢興運世之非責淵者衆矣臣請論之夫湯武之迹異乎堯舜伊呂之心亦非稷契降此風規未足爲證也自金張世族袁楊鼎貴委質服義皆由漢氏膏腴見重事起於斯魏氏君臨年祚短促服褐前代宦成後朝晉氏登庸與之從事名雖魏臣實爲晉有故主位雖改

臣任如初。自是世祿之盛。習爲舊準。羽儀所隆。人懷羨慕。君臣之節。徒致虛名。貴仕素資。皆由門慶。平流進取。坐至公卿。則知殉國之感。無因保家之念。宜切市朝亟革。寵貴方來。陵闕雖殊。顧眄如一。中行智伯。未有異遇。褚淵當泰始初。運清塗已顯。數年之間。不患無位。旣以民望而見引。亦隨民望而去之。夫爵祿旣輕。有國常選。恩非已獨。責人以死。斯故人主之所同謬。世情之過差也。

贊曰猗歟褚公德素內充民譽不爽家稱克隆
從容佐世貽議匪躬文憲濟濟輔相之體稱述
霸王綱維典禮期寄兩朝綢繆宮陛



